

HISTOR ADMIRABL

DEMEUS

AR BOUDEDEO

Pehini aboue maro hor Zalver, ne ra nemet bale noz ha deiz c'hann da fin ar bed, abalamour d'an effronteri an devoa bet en andret hor Zalver Jesus-Christ, pehini, pa voa o vont d'ar maro a falvezas dezan diskuiza var e stal, hag e teuz d'en rebuti evel eur scelerat.

Var don : GWERZ SANTEZ-ANNA

Asistanted enorabl, tostañ da glevet
Ar vues pitoyapla a voe biscoas ar bed ;
An histor zo truesus demeus ar boudedeo,
A zo nos deis o vale aboue hor Zalver maro.

Eus a tribu Neptali: a ker Jerusalem,
Voa ganet Absarius, carget a anathem ;
Dond a ra ar bed-man en amser Herodes,
A felveas masacri Jesus, Mab ar Verc'hes.

Va zad a voa eur c'halve, va mam kemeneres,
Hag a laboure en templ da ober broderes ;
Ha va c'herent am deskas da len-leor al lesen,
Hag hini ar profetet ives a dra serten.

Goude e voen demect gant va c'herent afin,
Da eur vreg fur a prudant a tribu Benjamin,
A hini 'm boa tri bugel en amser ma teuas
Aotrou Sant-Yan Badezour d'annons ar messias.

Sant-Yan a gonvertissas cals eus ar baianed
Pere voa idolaret, caledet er pec'hed ;
Dec mil den en eun dexes en deveus badeet
Me, va greg, va bugale e voamp bet o velet.

Va greg a lavaras d'in : va fried emesi,
Lecomp en em vadesi, ennont e ar Messi
Ha me o respont d'esi gant eun ear direspet :
Na ni nac or bugale na vimp ket badeet.

Aben eun neubeut goude Sant-Yan voe dibennet
Dre urs roue Herodes eun den cruel meurbet,
Ha ma teuas or Zalver evit ren en e blas
Hag a ras dre ar c'hanton cals a viraclou bras.

Klevet e meus bet Jesus alies o sermon,
Hep ne meus bet profitet eus e bredication ;
Va-unan e voa presant p'en doa rassasiet
Dec mil den, gant pemp para ha goudese pesket.

Me Boudedeo maleurus a velas c'hoas souden
Jesus o ressucita Lazar, breur Madalen,
Ha gulet dibossedi cals a dud possedet,
Ha sivoas din pec'her bras, ne meus tam profitet.

Aben eun neubeut goude voe Jesus kemeret
Gant cals eus ar Judevien er jardin Olivet,
A condonnet gant Pilat da rancout da zougen
Ar groas pouner a mezus evit ar bec'herien.

Pa voe ar groas achuet, hor Zalver voe samet,
Da vont da venes Calvar da vit crusliet
O velet an dud o redeg me gemer ma bugel
A me o vont da dal an nor pa ie en da vervel.

Setu Jesus o tremen neuse abiou va zi
Pehini en tal va stal a deu da reposi,
A me lavarar dean gant eur goms arrogant
Ke alesse eus va stal te zo eun den mechant.

Ganes eun desinoret gant da ifronteri
Pa o welan o reposi aman tal va zi ;
Kers alesse den ingrat cos, sorsor miliget,
Kers alesse d'ar maro pe c'heus he merited.

Jesus a respontas d'in gant eur voues truesus :
Mont a ran da bartia, den fal den malheurus,
Me reposo gant va zad, te valeo bepred
Dre bevar c'horn ar bed-man ac'han da fin ar bed

Ha te valeo a c'han d'ar jujamant,
Hag e c'hoste deo d'am zad am velo suramant
O varni a bec'herien pere voa condonnet
Da vont d'ar flammou gries ar re just d'ar joauset

Pa glevis comsou Jesus, va c'halon vo touchet
Ha me rei va bugale eun istant d'am fried,
Ma velis ar Veronic o sec'hi bizach Jesus,
Ha chom en e mouchouer e boltred truesus.

Heb c'hellout n'em arreti e c'heuillis hor Zalver.
Hag e velis va Jesus ha cals grages santel :
Ar bourrevien d'ar Verc'hes o deveus lavaret :
Setu ama an tachou ma vo o mab staget :

P'am boe gulet hor Zalver o vervel var ar groas
Ecreis etre an daou laer carget a boanniou bras,
Ha me commans va beach gant cals eus a anken
O tond da laret adieu da gear Jerusalem.

Sonjit 'ta Bretoned pegement a c'hlac'har
En deus ar boudedeo brema var an douar !
Rankoul cuitaat e gartier e wreg e vugale,
Hep kimiadi diouto evit atao bale.

Pa en devoe baleet eun nomp a vloavesiou
E erruas en Egypt pell bras demeus e vro,
Eno e ma ar Mor Ru elec'h moe tremenet
Moyses gant pobl Doue hep cavout drouc ebet.

Mond a ris eus ac'hane da enesen Candi,
Elec'h emedi en noas an dud a so enni :
Eno e velis eun tad o troc'hi a dammou
E verc'h evit sacrifis da rei d'o doueou.

Mont a ris da Malhodo e pelec'h e zeus tud drol,
Pere a ador Doue hag an diaoulou holl ;
Pedi reont Doue da gaout prosperite
Hag an diaoul a bedont ne rai ket drouc d'ese.

Guelet e meus er Japon eur vam meurbed cruel,
Hi deuas da lasa, siwas e daou buguel
Er vro-se e permetet lasa ar vugale
Pa n'o deus ket a vara da rei d'eze.

Goude kemeris an hent da vont d'an Enesi,
D'an Americ d'an Asie ha neuse d'an Turki
Ar grages eus ar vro-se a vale d'an arme,
Hag an esac'h o deus soign demeus ar vugale.

Eno emedi ar c'his da lasa ar baotred,
Nemet unan dre famil ne ve james miret,
Be a so eur rouanes a ro comandamant
Da lasa an holl botred hep caout de nep damant

Eur ger eus ar garniol eur eur c'his drol meurbed
Rac eno an dud yaouane pa veson eureujet,
E renco ar vreg yaouane nos kenta e eured,
Mont da gousket gant ar Prins vid bea enoret.

Bet on ebars eur c'hoad hanvet Cisarín,
Elec'h ma c'heller bale cant leo d'an neubenta
Hep cavet dour da eva na feunteun na rivier,
Ar pes so goal incomod da holl dud ar c'hartier.

Monet a ris c'hoas pelloc'h da gear a Vosopa
Pini so eus e divoul eur prins eus an drola :
Ur vanden chas ha merc'bed en deus evit gardou,
Ha n'en deus ken soudardet evit difen e vro.

Ac'hane 'yis da eur gear hanvet Estopet
Elec'h ma zeus serpentet ha loened vil meurbed
Zo ker teo ha corf eun den sur ma ven mesuret
O deveus d'an neubenta daou ugent troated hed.

Er spas demeus a gant vloas es on bet o vale,
Ha me erruout adarre em bro hag em c'hontre ;
Allas ! maro voa va greg couls ha va bugale,
Ha den abet eus va bro serten n'am anavee.

Neuse e teuis da Rom ebars an Itali,
En amser-ze a oa cals a c'hlae'har enni
Guelet a ris merseria nomp bras a gristenien,
En defot na renonsent d'o feis a do lesen.

Me a vale var mor couls a var an douar,
Ha me partiel neuse evit ar Frans, bro rar ?
E Marseille, Bourdel, Paris, Niort, Naoned Lyon
Ac'hane da Vreis-Izel, da gear vrao a Raoson.

Guelet e meus Montroules ne voa nemed eur c'hoad
Ha guelet Brest ha Kemper ebars an douar prat

Ha guelet ar gear a Is en e froserite
Hag ar gear a Lexovi a meus guelet ive.

Guelet a meus Breis-Izel en coat a menesiou,
Ma zoat evel sovajet neuse e bars er vro ;
Me a vel cals a geariou er vro-se batisset,
A ra cals a chenchamant abaoue ma zon bet.

Me vel ar gear a Raoson eur gear gaer batisset
Dol, Gwened ha Sant-Malo, Dinan hag an Naoned
Sant-Briec ha Landreger, Lannion Montroules,
Kastel-Pol ha Lesneven, ha Landerne ives.

Ar c'heariou-se meus gweled e coat hag e prajou
Pa deuis d'ober va beach kenta ebars er vro ;
Setu batisset Kemper, Brest ha Recouvrens,
Kemperle Moëlan Keraes ebars en assurans

Anfin pa oan condaonet gant Doue da vale,
Me so bet 'n em gavet e-c'rais meur a arme
Canoliou ha fusuliou, clescou sabrennou,
Netra ne de bet capabl de rei din ar maro.

Bet oun ebars en listri a so bet perisset,
Hag an dud a voa enne a meus guelet beuset,
Ha me anvet Boudedeo n'em bije drouc ebet
Comsou Doue a renko bea accomplisset.

Condaoned e zon gantan da chom var an douar
Comprenet holl cristenien hema zo din glae'har
Va zourmanchou er bed-man biken na echuo
Ken a deui Doue da varn ar beo hag ar maro.

Ar som eus a bemp gwennec zo em godel bepred
James ganen ne seurt clenved ne deu d'em ataket
Bet on ebars ar vroien elec'h moa ar vosen,
Hep na zeus staget ousin na clenved gant anken.

Va boutou na va dillat james na usont ket,
Dre bermission Doue a meus bet ofanset
Peder gwech a meus redet pevar c'horn arbed-ma
Ha guelet a meus ive cals chenchamant enna.

Brema e zon comanset da redec ar bemped
Hep ne don ambaraset gant dibri na cousket ;
Guelet a meus broiou zo bet holl revinet
Ha cals demeus ar geariou gant ar gurun devet.

Ne meus bet cals amser evit chom da parlant
Me a gred e ma va zreid vargore glaou ardant
Nan, ne zeus nemet Doue a elfe discleria
Ar boanniou bras a soufran kerkent ma reposan.

Pebeus maleur e din-me bea bet rebutet
Demeus a guichen va stal Jesus Salver ar bed
Pa voa o vont d'ar maro, da zond da ziscuisa
Ha me neuse dre valeur a zeuas de zisprisa.

Ema e ar maleur bras a meus var ar bed-ma,
Emon atao o vale ouspen trivec'h cant vla,
Ha c'hoas e renkan bale a-c'han da fin ar bed :
Pedit Doue evidoun ma zin d'ar joausted.